

# INUIT ATAQATIGIIT

## Inatsisartuni



24. juni 2018

UKA 2018/46

Inatsisartut suleriaasiat § 33 immikkoortoq 1 naapertorlugu matumuuna inatsisartunut aalajangiiffigisassatut siunnersuut imaattoq saqqummiuppara.

**Ingerlatseqatigiiffimmik Namminersorlutik Oqartussat aalajangiisuusunik sunniuteqarfigisaanik aatsitassanut suliniutinik pilersaarusiornermik qalluinermillu siunertaqartumik pilersitsinissaq pillugu Naalakkersuisut kingusinnerpaamik UPA2020-mut nassuiaammik saqqummiussinisaat pillugu Inatsisartunut aalajangiiffigisassatut siunnersuut. Nassuiaammi ilanngullugu ingerlatseqatigiiffimmut aningaasalersueriaatsit piginneqatigeeeriaatsillu ilanngunneqarnissaanik Naalakkersuisut kissaateqarfigineqarput. Nassuiaammissaaq aatsitassanut suliniutinut qanoq annertussusilinnut ingerlateqatigiiffiup aningaasalersuinissaanik piviusunngortitsinissaanullu siunnerfilerneqarnissaa ilanngullugu eqqarsaatigineqassaaq.**

(Inatsisartunut ilaasortaq Aqqaluaq B. Egede, Inuit Ataqatigiit)

### **Tunngavilersuut:**

Matumani aaliangiiffigisassatut siunnersuummi Namminersorlutik Oqartussat pigisaanik aatsitassarsiorluni ingerlatseqatigiiffimmik pilersitsinnaanissamat periarfissat pilersitsinermilu piginneqatigiiffiloriaatsit assigiinngitsut aammalu aningaasarlersuieriaatsini periarfissat pillugit Naalakkersuisut nalunaarusortoqassasoq siunnersuutigaara. Suliaq manna inuiaqatigiinnut siunissamullu pingaarutilimmik inissittussaammat aatsitassarsiorluni susassaqtartut nassuiaasiormermi akuutinneqarnissaat aaliangiisuulluinnarpoq. Nunatsinni aatsitassarsiorluni ingerlatat pillugit Inatsisartunut nassuiaat saqqummiunneqartarpoq, maannali piffissanngorpoq inatsisartuti goortumik kingumoortunik eqqartuinata siunnerfileqatigiinnissarput.

Aatsitassanut oqartussaaffik naalagaaffimmiit tigugatsigu oqartussaaneerpullu nammineq nunatsinni ingerlatileratsiguli kikkut nunatsinnukarlutik aatsitassarsiulerumaarnissaanik kaammattuisuarluta ingerlatsivugut. Piffissanngorssoraara immitsinnut periarfissilluta inuussutissarsiut nutaatut oqaatigisinnaasarput aamma uagut nammineq ilisimatusarfigalugulu ineriartortissagipput.

Allanik isumallusersortuaannarutta nammineq pisinnaasavut pisinnaalernissarpullu qaffassarnaviangilagut, alloriangisaannassallutalu. Naalakkersuinikkut nunatta killiffiani, nunami namminersortumi nunap inuisa namminneq suugaluarnersunik nutaanik kivitsinnaassuseqalernissaat isumalluutaavoq. Siulliuniallaqqissisariaqarpugut, aamma siunertanik

nutaanik isummeriaatsinillu nutaarluinnarnik qalluisariaqarpugut. Taamaaliortariaqarpugut inuunitsigut aningaasarsiorntsigu alloriarusulluta.

Nunatta namminersulernissaa naalackersuinnikut piareersaasiorneqarmat Namminersorneq Pillugu Isumalioqatigiissitarsuup suliaani innersuussutigineqartut ilagaat inuussutissarsiummik ataasiinnaavallaamik nappateqarnerput pisussaaffiliisoq inuussutissarsiuutinik allanik nutaanik pilersitsiortorniarnissatsinnik. Ilaatigullu aatsitassarsiorneq immikkut periarfissatut inassutigineqartunut ilaalluni. Tamannalu aamma Namminersorneq Pillugu Inatsit akuerineqarmat sulianik annertuunik inatsisiliornernillu malitseqartissimavarput.

Aatsitassarsiornermik ingerlatsilerumagatta aatsitassarsiornermik ilinniarfik pilersinneqarpoq. Inuusuttorpassuit sulisartorpassuillu siunissami aatsitassarsiornermik ingerlatsilerumasut inuppasuit ilinniarumassusaatigut ersersinneqartoq suliffissanik malitseqartinneqartariaqartoq isumaqarpunga. Sulisartut amerlissappata, aamma suliffissanik nutaanik neqerooruteqarsinnaanerput annertusartariaqarpoq.

Takorloornaqaaq uagut nammineq inuussutissarsiut nutaaq nunatsinni nammineerluta ineriartortillugulu piginnaangorsarfigisimallugu, aamma aningaasarsiornikkut nunatta avataanut aniatitsinerput illua-tungilerlugu nunatta avataaniit aningaasanik isaatitsinissarput nutaaq atorluarusunnaqaaq. Oqarusunnaqaaq,- sapinngilagut, iluatsissavarput, nutaaliussaagut. Nalunanngilluinnartoq ataaseq tassaavoq; ikioqatigiilluarutta iluatsissaqqaaratsigu.

Naalackersuisut aamma Inatsisartuni partiit tamarnik suleqatigiinnerat tunngaviliinerallu naqissusiilluta suaarutiginiartigu. Siusinnerusukkut takoreerparput kikkut aatsitassarsiuernaarnissaannik utaqquarneq qanoq isumallualussinnartigisinnaanersoq. Nammineq sulilluta iliuseqarluta ingerlatsiniarta isumalluutigit angorusutavullu nammineq ineriartortillugillu piviusunngoqqullugit. Tamanna nunatut namminersortutut aatsitassarsiornermik ingerlataqarusuttumut ajunaarutaanani iluanaarutaassammat. Suliffissat nutaat allanit pajugutigineqarnissaat utaqqinagu nammineq pilersitsinissarput periarfissatsialaammat.

Siunnersuuteqartutut nerioqaanga siunnersuut una qinikkanit tamanit piginneqataaffigineqarluni suliaassanngortinneqassasoq. Nerioqaanga ataatsimoorluta akisussaaffik tigussagipput, inuussutissarsiullu nunarsuarmioqaterpassuatta iluaqutigilluagaat aamma maani nunatsinni inuiaqatigiittut iluaqutigillualissagipput. Qilanaarpunga siunnersuut pillugu isummersuutissasi tusaallugillu nalilersueqatigiinnissatsinnut.

Oqallilluarisi.

### **Pisortaqaqfinnut aningaasaqarnikkut allaffissornikkullu kingunissat:**

Nalunaarusiaq ukiup iluitsup iluani naammassineqarsinnaassasoq naatsorsuutigineqarpoq, suliaq tamanna A/C fuldmægtigip ukiumut iluitsup iluanni suliarineqarsinnaanera naapertuussorineqarpoq, tassa 500.000 koruunit missaannik nalileqartoq.

**Aningaasaqarnikkut allaffissornikkullu inuussutissarsiortunut namminersortunut kingunissai:**

Naatsorsuutigineqanngilaq inuussutissarsiortunut namminersortunut aningaasarsiornikkut kingueqassasoq.

**Aningaasaqarnikkut allaffisornikkullu innuttaasunut kingunissai:**

Nalunaarusiorneq aningaasaqarnikkut innuttaasunut sunniuteqassanngilaq.